



## INSTITUT ZA RAZVOJ MLADIH KULT

Ul. 4. viteške brigade 34-36 BA, 71 210 Ilidža, Sarajevo

E-mail: [kult@mladi.org](mailto:kult@mladi.org)

Tel.: 033 778 778; fax: 033 778779

Web: [www.mladi.org](http://www.mladi.org)

### ✚ Formirana Mreža Mladi odlučuju!

Tokom sastanka kojem su prisustvovali predstavnici/e organizacija iz pet zemalja učesnica inicijative *Mladi odlučuju o demokraciji!*, bilo je riječi o zajedničkim aktivnostima koje će ove organizacije provesti u predstojećem periodu. 18 organizacija iz BiH, Srbije, Makedonije, Kirgistana i Moldavije na sastanku je planiralo aktivnosti čiji je cilj osnažiti ulogu mladih u procesu donošenja odluka. Tokom sastanka formirana je mreža *Mladi odlučuju!* koja će uspostavljanjem ovog partnerstva stvoriti održivu koaliciju organizacija.



### ✚ ROB u trouglu moći

Konferencija ROB u trouglu održana je sredinom decembra, u okviru inicijative Rodnopravni budžet za mlade. Nakon procesa koji je počeo dijalogom s lokalnim uprava i udruženjima iz Srbije, Hrvatske i BiH, nastavio s programom obuke u tri modula, realizacijom lokalnih građanskih inicijativa u 9 lokalnih zajednica tri pomenute zemlje regije, zaokružujemo ovom konferencijom.



Tema konferencije jeste rodna odgovornost u trouglu moći: rodno odgovorna vlast, rodno odgovoran građanski sektor, rodno odgovoran privatni sektor te neizostavan faktor utjecaja: rodno odgovoran marketing i mediji. Neuobičajenim načinom - KULTalk - obratit će se predstavnici/e Agencije za ravnopravnost spolova BiH, UN WOMEN te Ekonomskog fakulteta Univerziteta u Sarajevu. U okviru konferencije polaznice i službenici/e za mlade će imati dodjelu certifikata za uspješno završen program obuke Rodnopravni budžet za mlade.

### ✚ Međunarodni dan osoba s invaliditetom: Ja BiH bez barijera

Međunarodni dan osoba s invaliditetom - 3. decembra obilježava se širom svijeta. Lijepo je vidjeti ljepotu boja. Svijet tišine je nekada glasniji od stvarnog. Umjetnost nas pokreće... Ja BiH bez barijera! U povodu obilježavanja ovoga međunarodnog dana Institut za razvoj mladih KULT i učesnici/e više od 20 nevladinih organizacija iz čitave Bosne i Hercegovine su, u sklopu programa *Jačanje institucionalnih kapaciteta USAID-ovih partnera u BiH*, odlučili ukazati na položaj i probleme s kojima se svakodnevno susreću osobe s invaliditetom. Obilježavanjem ovoga datuma ne teži se samo podizanju svijesti o dobrobitima integriranja osoba sa invaliditetom u sve aspekte političkog, ekonomskog i kulturnog života već i o njihovom realnom i konkretnom uključivanju u društvene procese. Inicijativom Ja BiH bez barijera!, želi se ukazati na diskriminatoran položaj u kojem se nalaze osobe s invaliditetom koje se služe invalidskim kolicima ili drugim pomagalicama, a koje vrlo često ne mogu pristupiti objektima od javnog interesa zbog neprilagođene infrastrukture.

### ✚ 52 vršnjačka edukatora/ice poručuju *Mladi odlučuju!*

27 mladih koji žele aktivno djelovati u procesu donošenja odluka, ali i istovremeno osnaživati druge mlade ljude da preuzmu aktivnu ulogu u društvu, prisustvovalo je četvrtom modulu obuke za vršnjačke edukatore/ice *Mladi odlučuju!*, koji je održan početkom decembra 2013. g. u SPAJALICI. Mladi iz četiri zemlje, BiH, Srbije, Makedonije i Kirgistana su na završnom modulu obuke pohađali radionicu Vršnjačka edukacija, koja je objedinjavala teme prethodna tri modula obuke, kao i trening za trenere/ice. Nakon uspješno održanog završnog modula obuke *Mladi odlučuju!*, održana je svečana dodjela certifikata vršnjačkim edukatorima/cama. U Kišnjevu (Moldavija) također je održan četvrti modul obuke za vršnjačke edukatore/ice *Mladi odlučuju!*.

### ✚ Mladi prate politiku prema mladima

V i VI modul obuke o temama Javno zagovaranje (razvoj zagovaračkih vještina, odnosi sa javnošću, provođenje javne kampanje) i Javno zagovaranje i lobiranje saradnje sa vlastima u razvoju, provođenju i monitoringu strategija prema mladima, održan je u decembru u SPAJALICI. Obuci su prisustvovali predstavnici/e vijeća mladih/omladinskih savjeta uključeni u inicijativu Mladi prate politiku prema mladima. U okviru radionice Javno zagovaranje učili su polaznici/e obuke kako zagovarati interese javnosti stvarajući trajne društvene promjene bez obzira da li je cilj poboljšanje položaja mladih, stvaranje jednakih mogućnosti za žene ili pak izgradnja boljeg školskog sistema.



### ✚ Promocija Analize stanja i položaja mladih u Federaciji BiH 2013.

Sredinom decembra, u zgradi Vlade Federacije BiH održala se Promocija Analize stanja i potreba mladih u Federaciji BiH 2013. Ova analiza pripremljena je u uskoj saradnji između vladinog i nevladinog sektora, tačnije Federalnog ministarstva kulture i sporta i Instituta za razvoj mladih KULT. Istraživanje je utemeljeno na zakonskim obavezama proizišlim iz Zakona o mladima FBiH i urađeno je s namjerom da bude polazna osnova za izradu strategije prema mladima FBiH. Promociji analize prisustvovali su predstavnici vladinog i nevladinog sektora, općinska i kantonalna vijeća mladih iz FBiH, koja su zakonski predstavnici/e mladih te brojni mediji.

### ✚ I Đakovo se upisao na listu rodno odgovornih lokalnih zajednica

Institut za razvoj mladih KULT je u saradnji s Udrugom za mlade Đakovo organizirao vršnjačke radionice za preko 40 mladih Grada Đakova. Radionica se održala u Gradskoj knjižnici Đakovo protekle sedmice. Zapaženo je da mlade djevojke i muškarci dobro poznaju situaciju i društveno-politička zbivanja svoje zajednice, pa su i spremni djelovati i lobirati za jednaka prava za sve na jedan savremeni i demokratičan način. Kroz praktične primjere navodili su situacije u zajednici, ali odmah i nudili rješenja. Bez predrasuda i stereotipa pokušali su da riješe neke od postavljenih zadataka koje im je edukatorica čitala.

### ✚ Održan osamnaesti Narandžasti Dan

25. decembra, kao i svaki 25. u mjesecu obilježava se Narandžasti dan u cilju prevencije nasilja nad ženama i djevojkama. Institut za razvoj mladih KULT osnažuje mlade da djeluju u pravcu rješavanja ovoga problema. Podijelite svoju narandžastu fotografiju s drugima koji dijele Vaš stav. Oni koji su to učinili tokom 25. decembra (180 autora/ica fotografija) na FB stranici institut.kult, postali su vlasnici/e narandžastog kalendara za 2014. g.



### ✚ Čekajući 5. decembra, Međunarodni dan volontera/ki

Od 17. decembra 1985. se svake godine 5. decembra obilježava Međunarodni dan dobrovoljnog rada za ekonomski i društveni napredak, odnosno Međunarodni dan volontera. Ljudi dobre volje, kako ih nazivaju, za svoj rad ne očekuju materijalnu nadoknadu, osim moralnih i društvenih satisfakcija, a pomaganje i posvećivanje vremena drugima smatraju izrazom ljudske humanosti, solidarnosti i uzajamnosti, kao i osećanjem odgovornosti za svoju zajednicu. Ove godine Institut za razvoj mladih KULT u saradnji s Federalnim ministarstvom pravde i UN Volunteers 5. decembra pokrenuo je online nagradni kviz o poznavanju odredaba iz Zakona o volontiranju FBiH i Zakona o volontiranju Republike Srpske. Nagrada je bila tablet, a pravo na učešće imali su svi građani/ke BiH. Komisija u sastavu od 3 člana slučajnim je odabirom između svih pristiglih tačnih odgovora na sva postavljena pitanja u okviru kviza izvukla sljedeću osobu, koja je dobitnik tableta: SLOBODAN BLAGOVIČANIN, BIJELEJINA.

### ✚ Prilika za mlade pravnike/ce

Institut za razvoj mladih KULT informira buduće ili već sada mlade pravnike/ce o mogućnosti članstva u asocijaciji ELSA, koja pruža priliku mladim kolegama sa Pravnog fakulteta u Sarajevu da postanu dio našeg tima i dobiju priliku za lični i profesionalni razvoj, kao i da upoznaju kolege/ice studente i stručnjake/inje iz oblasti prava, kako u BiH, tako i širom Evrope. Konkurs se otvorio 17. decembra 2013., i trajao do 24. decembra 2013. g. Na dan otvaranja konkursa, naš tim je održao info čas na Pravnom fakultetu u Sarajevu na kojem su svi zainteresirani mogli saznati više o misiji i viziji ELSA-e, informisati se o predstojećim aktivnostima, načinu apliciranja, kao i saznati iskustva kolega/ica koji su učestvovali u dosadašnjim projektima ELSA-e.

### ✚ Integritet.ba: Individualizacija političke odgovornosti: Koliko je ko učinio za mlade!?

Institut za razvoj mladih KULT pripremio je web-platfomu „integritet.ba“, mehanizam koji sadrži sveobuhvatne podatke o naklonjenosti institucija vlasti prema mladima u BiH, u skladu sa zakonskim obavezama koje imaju. 30. decembra 2013. g. u 11 sati, u Centru za kulturnu i medijsku dekontaminaciju u Sarajevu, održana je press-konferencija na kojoj su prezentirani zanimljivi podaci evidentirani u web-platfomi. Institut objavljivanjem ove web-platfome ukazao je pojedinačno na 230 institucija vlasti u BiH koje su nadležne za pitanja mladih i zakonske obaveze koje prema njima imaju: nadležna entitetska i kantonalna ministarstva, zatim entitetska i kantonalna ministarstva koja u svom djelokrugu imaju mlade te općine/opštine i gradove. Također, podaci koji su pojednostavljeno i slikovito prikazani pokazuju nivo implementacije politika prema mladima i političke naklonjenosti prema njima od strane svake institucije, njenog rukovodioca i političke partije iz koje dolazi. Cilj Instituta je da se na konstruktivan način dođe do identifikacije problema izuzetno teškog položaja mladih u našoj zemlji te individualizira odgovornost za zastrašujuću političku nebrigu prema ovoj populaciji. Integritet.ba trenutno evidentira više od 200 institucija i rukovodnih lica u njima te preko 500 dokumenata koje su institucije vlasti dostavile za potrebe ove evidencije, te omogućava svojevrsnu komparaciju najboljih i najgorih institucija, rukovodnih lica i političkih partija (iz kojih predmetni kadrovi dolaze) u kontekstu institucionalne (ne) brige o mladima u BiH.

### ✚ Kafa sa... Damirom Nikšićem

SPAJALICA je u decembru odzvanjala zdravim smijehom mladih ljudi koji su uživali u druženju sa poznatim bosanskohercegovačkim umjetnikom, Damirom Nikšićem. Družili smo se sa umjetnikom Damirom Nikšićem i razgovarali o raznim temama koje muče mlade ljude na ovim prostorima. Pitanja o kreativnosti kod mladih, o obrazovnom sistemu, problem pasa lutilica i eutanazije, kuda nas vodi politički sistem BiH, komparacije socijalizma i kapitalizma, primjeri dobre prakse rješavanja društvenih problema iz nekih drugih, razvijenijih zemalja i sl. Damirov „provokativan“, direktan i "bez dlake na jeziku" stav o trenutnim zbivanjima i problemima u državi nas je svijetu nasmijao do suza, te prikazao iste kroz jednu drugačiju percepciju, umjetničku.